

四庫全書

集部

欽定四庫全書

宋文鑑卷十一

宋 呂祖謙 編

律賦

有物混成賦

虛象生在天地之始

王 曾

妙物難模先天有諸著自無名之始生乎立極之初不
縮不盈賦象寧窮於廣狹匪雕匪斲流形罔滯於盈虛
原夫未辨兩儀中含四象雖欲兆於形質曾莫知夫影

響問洪纖而莫得自契胚渾考上下以都忘孰分天壤
及夫大樸將散三光欲萌清濁待茲而一判昏明由是
以相生然後品彙咸觀用作有形之始淳和外發或知
至道之精是何小不隱於纖介大不亢於寰海配一氣
以冥運亘終古而斯在縱陰陽之推盪我質難移任變
化之紛紜斯形不改豈不以有者真有之基物者生物
之先冥搜而兆朕斯顯寂聽而音容莫傳得我之小者
散而為草木得我之大者聚而為山川視焉且無訝深

蟠於厚地搏之不得疑上極於高天本自彊名誠難取
類其始也既出無而入有其終也亦規天而矩地既不
可指掌而窺又不可困人而致明君體之而成化則所
謂無為而為君子執之而立身亦同乎不器之器無反
無測神之聽之諒潛形於恍惚實委化於希夷傾毀何
由固秉持之在我剛柔有體將用捨以隨時今我后掌
握道樞恢張天紀將窮理以盡性思反古而復始巍巍
乎執大象而撫域中達妙有之深旨

金在鎔賦

金在良冶
求鑄成器

范仲淹

天生至寶時貴良金在鎔之姿可覩從革之用將臨熠
耀騰精乍躍洪鑪之內縱橫成器當隨哲匠之心觀其
大冶既陳滿籬斯在俄融融而委質忽皦皦而揚彩英
華既發雙南之價彌高鼓鑄未停百鍊之功可待況六
府會昌我稟其剛九牧納貢我稱其良因烈火而變化
逐懿範而圓方如今區別妍媸願為軒鑑儻使削平禍
亂請就干將國之寶也有如此者欲致用於君子故假

手於良治時將禁害夏王之鼎可成君或好賢越相之
容必寫是知金非工而弗用工非金而曷求觀此鎔金
之義得乎為政之謀君諭治焉自得化人之旨民為金
也克明從上之由彼以披沙見尋藏山是務一則求之
而未顯一則棄之而弗顧曷若動而愈出既踴躍以求
伸用之則行必周流而可鑄美夫五行之粹三品之英
昔麗水而隱晦今雖治而光亨流形而不縮不盈出乎
其類尚象而無小無大動則有成士有鍛鍊誠明範圍

仁義俟明君之大用感良金而自試居聖人天地之鑑亦庶幾於國器

德車結旌賦

車結旌者昭德之美

宋庠

君有至德時乘大車當偃革以無外乃結旌而有初奉駕陳儀采物雖資於備設鳴鸞示禮旂旒匪俟於垂舒順考前經鋪聞往說謂戎事以既息貴君車之有結雍容撫軾蓋藏飾以尚純肅穆展鈴詎垂旒而就列蓋由抑乃盛飾昭夫令名雖冠品於輿服蔑揚威於旆旌肅

軫無譁方斂藏於旂屬馳輪有度靡赫奕於綏纓且夫
禮有質文器隨用捨車號乎德則崇化於邦本旌結其
表則示人於天下意自象見名非人假君軒弭節孰訝
乎卷而懷之國乘制容益顯乎素為貴者是知車之用
兮充德以成大旌之飾兮輔威而孔昭既武怒之不作
信軍容而外銷組轡啓行陋邦旄之子子錯衡遵路殊
風旆之搖搖若然則動有彛儀文無異色雖嚴駕以備
物終去華而表德故使禮典攸重民瞻不忒皇皇整御

始中括於采章轆轤肅容豈外揚於藻飾用能上載明德旁昭縉儀自駕言而戾止殊幅裂以藏之升降惟寅僅比非心之屋章明盡屏寧同止獵之綏大矣哉邦禮是崇帝儀資始實務德以垂教必收旌而昭理宜乎國容備而兵器銷率由茲而盡矣

應天以實不以文賦

天應誠德
豈尚文為

歐陽修

天災之示人也若響應聲君心之奉天也惟德與誠固當務實以推本不假浮文而治情彼雖不言謫見以時

而下告吾其修德禍患可銷於未萌臣聞天所助兮惟

善則降祥德苟至兮雖妖而不勝皆由人事之告召然

後天心之上應若國家有闕失之政則當頻見於衆災

欲人主知戒懼之心所以保安於萬乘臣請述當今之

所為引近事而為證至如陽能和陰則雨降若歲大旱

則陽不和陰而可推去年大旱陰不侵陽則地靜若地頻動

則陰干於陽而可知去年河東地頻動又如黑者陰之色晦者

陰之時或暴風慘黑而大至白晝晦冥而四垂

康定元年三月

欽定四庫全書

天文
卷十一

黑風起 日食正旦雨水木枝今春如此之類皆陰之為

蓋陰為小人與婦女又為大兵與蠻夷若四方之為患則羣陰之失宜故天象以此告吾君不謂不至陛下所宜奉天戒不可不思是謂應以實者臣敢列而言之若夫慎擇左右而察小人則視聽之不惑肅清宮闈而戒冗列則恭儉而成式況乎遠佞人者孔宣父之明訓放宮女者唐太宗之盛德又若西師久不利宜究兵弊而改作叛羌久未服宜講廟謀之失得在陛下之至聖行

此事而不忒庶天意之可回雖有災而自息方今民疲
賦斂之苦又值饑荒之年貲財盡於私室苗稼盡於農
田劫掠居人盜賊並起流離道路老幼相連陛下視民
如子覆民如天在於仁聖非不矜憐故德音除刻削之
令赦書行賑濟之權然而詔令雖嚴州縣之吏多慢人
死相半朝廷之惠未宣天至高遠也惟可動以精誠民
之休戚也皆繫君之好尚惟善政之能惠則休符之並
貺富有四海之大獨制萬民之上一言之出分誰敢不

欽定四庫全書

宋文
卷十一

六

從百事責實分自然無曠發號施令在聖意之必行變
災為祥則太平之可望今漢史有五行之志尚書有洪
範之文願詔侍臣之講說許陳古事於聽聞可以見自
召妖災雖由於時政能招福應亦自於明君故永偃於
風表周王之覺悟雉鳴于鼎成商帝之功勲蓋恐懼修
省者實也在乎不倦祈禳消伏者文也皆不足云臣生
逢納諫之聖明不聞直言之狂斐惟冀愚忠之可採苟
避誅夷而則豈蓋賦者古人規諫之文臣故敢上于於

旒宸

王畿千里賦

畿制千里
尊大王國

宋 祁

王有一統人無異歸中四方而正位畫十里以為畿總
大衆之奠居式昭民極據方來而處要以重皇威二代
而還維周有制肇庶績以圖大廓多方而為衛作我上
國垂諸永世以謂地非中夏無以示天子之常尊土不
一圻無以待諸侯之入計爾乃測圭於地考極于天風
雨之所交者道里之必均焉郊野錯而回合鄉遂亘而

蟬聯溝封斯萬疆場且千差籍九畿定夫家於都鄙出
車萬乘括賦入於原田是謂辨方且非期侈廓焉天府
之國巍乎王者之里爵祿命賜之供億朝覲會同之底
止不偏陋以取侮不夸矜而役美侔江海之重潤乃據
上游法日月之徑圍用張天紀且其蠻獠面內玉帛駿
奔內則百官承式外則四國于蕃化之遠者禮益廣歸
之衆者務愈繁必在制廣輪於有截示極摯於羣元倍
十子男大有由而御小任包旬稍卑不得以侔尊亦由

天之高燾物而無外地之厚廣生而咸賴使高而可度
則寥廓何仰厚而易知則沉潛有害是用控天下以咸
乂極宸居而稱大詩美四方之是則理乃同歸史稱後
世之無加事誠胥會美夫周原膺膺禹畫芒芒或處瘠
為教或建瓴是防然皆按成事於神甸跡前謀於令王
所以漢相論都首識金城之廣召公相宅前知墨食之
祥洪惟我朝奄有方國託宏基於天地亘長藩於道德
所以申畫邦畿是用守之無極

百工由聖人作賦

以工善其事由聖人作爲韻

陳襄

統爾六職良哉百工何藝事以斯作由聖人而是崇辨
器成能自乃神而立制化材適用本惟審以興功蹟姬
旦之明文見冬官之盛典謂夫智之出也始創物以興
制工之立也乃成器而盡善嘉衆藝之勃興本聖謀而
丕闡攻金攻木資濬哲以裁成作舟作車由靈機而洞
顯自茲立器為利因材究奇雖大匠之述作皆往哲之
規為既執技而紛若誠取法以宜其所以鳧氏成鐘自

高辛而立範車人作耒本炎帝以垂規且夫國有四民
工分百事或居肆以成業或飭材而興利率皆因上聖
以資始致宏規而綽備依於法而游於藝肇自神謨智
者憂而巧者勞出由睿意豈不以工之立事者蓋本於
前修事之經始者必資於善謀伊衆制之雖盛非聖作
以奚由網罟以畋寔庖犧之肇用杵臼之利因熊氏以
垂休自然衆伎靡紛大模率正雖云乎代守其業但見
乎作者之聖亦由五聲兆黃鍾之律節奏爰彰大輅起

椎輪之姿雕幾采盛此則藝能交舉物用具陳祖述雖
資於匠者經營率自於古人按乃度程實聰明之制作
勤乎樸斲資睿哲之經綸噫夫世變澆漓時蠲朴略高
曾之矩交喪器用之資惟錯今上方稽古道而復淳源
立是工也體聖明之所作

首善自京師

賦崇勸而學
為天下始

王安石

王化下究人文內崇繫京師首善之教自太學親民之
功闡承師論道之基先繇轍下廣成俗化民之誼甫暨

寰中古之聖人君有天下治遠於近制衆以寡不用文
何以修飾政教非設校何以崇明儒雅迺建左學率先
諸夏在郊立制繫一人之本焉養士興仁形四方之風
也本仁祖義取材斂賢講制量于中土宅聲明於普天
始于邦家用廣師儒之衆行乎鄉黨斯為庠序之先是
何拳拳諸生亶亶先覺所傳者道德仁義所肄者詩書
禮樂以言乎功則萬世用又以言乎化則八紘匪邈其
流及於三代率以明倫此理達於諸侯誰其廢學故曰

校官者庶俗之原本京邑者羣方之表儀養原於上則庶俗流被設表於內則羣方景隨惟時於變繫上之為三王四代惟其師使人知化兆姓黎民輯於下自我興基向若俗敗隄防朝隲統紀教化之宮衰落禮義之官廢弛鄉風者無以勸於善肄業者不能官其始則撫封之主毀鄉校者有之承學之民在城闕者多矣必也啓胃子之祕宇據神邦之典區憲先王而講道風下國以恢儒邑翼翼以宅中契商人之詠士彬彬而蒙化參漢

室之謨噫孝武逸王也而有興置之謀公孫具臣也而有將明之論矧睿明之主紹起俊乂之僚並建宜乎隆儒館以視方來使元元之敦勸

厯者天地之紀賦

聖人以通天地之數

蘇頌

昔聖王建官司地因象知天推厯用明於大紀考星咸自於初躔合三體以為元成書最密舉二篇之定策備數無愆古有善談載於前志因太初創厯之首述往聖知時之義莫不究極象數精窮天地有時以記夫啓閉

有日以紀乎分至躔離弦望也於此而為正晦朔昏明也於此而攸示下可辨乎斗建上靡差於辰次惟君審璣衡之運所以緒正於元功使民知寒暑之來然後順修於時利況夫厯為一歲之本紀明太極之基推精浸之至妙豈深恩之與知必也迎辰以策定晷于儀帝舜則羲和而分命顓頊則重黎而是司皆所以準厥二氣乘於四時聖有作也人皆度之制自清臺得舉正履端之要職由太史盡觀文察理之宜若乃辰集于房月窮

于紀孟陬既協於月建攝提亦隨乎杓指國將班正朔
以為令王乃觀情性而順理章部元之書兮著於彼子
丑寅之正兮見於此可以察發斂於未然定舒慘之所
以推而生律子陽午陰而互分治以明時春作秋成而
是擬且夫天之運也日與星而代逢地之道也柔以剛
而莫窮非乃聖無以探其賾非立法無以舉其中我乃
錯綜氣候稽參變通起建星而運算故積歲以成功考
連珠合璧之辰得名尤邃應大呂黃鐘之統立道斯同

用能鈞校舊儀審觀新度成敗因之而遂紀氣節於焉
而可步于以極陰陽之大端于以備六五之中數亦何
異魯經比事舉二中以歲成義易窮神合五位而象布
後王以是知厯象不可不審經紀不可不循或立元而
謹其始或節事而授於民馮相則致乎日月保章則志
夫星辰以定五十五數以通三百六旬所謂見道而知
治何患以天而占人彼為刻漏以考中星但紀曉昏之
度處璇璣而觀大運蓋明氣候之因猶未若測運動於

二儀齊往來於七政建乃星紀先夫算命吾皇所以監
古歷之尤疏頒新書而考正天人之際因以明焉乃知
夫作者謂聖

圓丘象天賦

圓丘就陽
上憲天體

鄭 獬

禮大必簡丘圓自然蓋推尊於上帝遂擬象於高天必
在國南蟠宏基之高厚用符陽體取大運之周旋王者
揆禮之文為民之唱修明大禘導迎景貺有祭焉格神
于下有祀焉享帝于上謂丘也其形特異我所以貴其

自成蓋天也其體亦圓我所以法之相尚爾乃旋仲冬
之序迎至日之長掃以除地升而詔王是必肇靈壤以
高峙模圓清而上當擇吉土之成基乃定其位倣高穹
之大體以就乎陽由是懽然神意交穆然天貺授徧羣
靈以從之祀嚴太祖以爲之侑煥爾盛容配乎大就成
非人力聳寶勢以下蟠仰合乾儀環太虛而高覆然則
禮有物也其制可象天無形也其端可求故我相法於
厚地取類於重丘崇崇其高隱若積土之固浩浩其大

渾如洪覆之周是故有橐籥以藉誠有陶匏以薦禮大
裘焉以彰其質蒼璧焉以象其體固異周朝授政築層
級之三成漢祀命郊兆重階之八陛是則事至神者物
無以稱其德接至高者丘所以表其虔與地居上如天
轉圓對方澤之成形乃殊其象規大儀之冥運自貴其
全聖人所以明禮大原建邦茂憲兆其成迹符於至健
夫然因天事天得先民之至論

濁醪有妙理賦

神聖功用
無捷於酒

蘇軾

酒勿嫌濁人當取醇失憂心於昨夢信妙理之凝神渾
盎盎以無聲始從味入杳冥冥其似道徑得天真伊人
之生以酒為命常因既醉之適方識此心之正稻米無
知豈解窮理麴蘖有毒安能發性乃知神物之自然蓋
與天工而相並得時行道我則師齊相之飲醇遠害全
身我則學徐公之中聖湛若秋露穆如春風疑宿雲之
解駁漏朝日之暎紅初體粟之失去旋眼花之掃空酷
愛孟生知其中之有趣猶嫌自老不頌德而言功兀爾

坐忘浩然天縱如如不動而體無礙了了常之而心不
用坐中客滿惟憂百榼之空身後名輕但覺一盃之重
今夫明月之珠不可以襦夜光之璧不可以鋪芻豢飽
我而不我覺布帛煥我而不我娛惟此君獨游萬物之
表蓋天下不可一日而無在醉常醒孰是狂人之藥得
意忘味始知至道之腴又何必一石亦醉罔閒州閭五
斗解醒不問妻妾結襪庭中觀廷尉之度量脫鞬殿上
夸謫仙之敏捷陽醉過地常陋王式之褊鳴歌仰天每

譏楊惲之狹我欲眠而君且去有客何嫌人皆勸而我
不聞其誰敢接殊不知人之齊聖匪昏之如古者晤語
必旅之於濁醒者汨羅之道也屢舞者高陽之徒歟惡
蔣濟而射木人又何狷淺殺王敦而取金印亦自狂疎
故我內全其天外寓於酒濁者以飲吾僕清者以酌吾
友吾方耕於渺莽之野而沒於清冷之淵以釀此醪然
後舉窪樽而屬予口

三階平則風雨時賦

泰階既平
風雨時若

孔文仲

圓極之運太階以平表聖神之德盛致風雨之時行位
正六符炳光芒於常次氣流四序普散潤於羣生大儀
之遠兮其體高明列宿之繁兮其文交錯君道修於下
則瑞為之證人事失於此則變從而作偉一德之溫恭
感三階之炳燦騰精于上燭太微紫微之居垂象於人
應時雨時風之若燦燦華藻蒼蒼昊穹常燁乎太一之
座密次乎文昌之宮則必天地協應陰陽大同沐之以
膏雨撓之以祥風上耀高躔既色齊而光大俯呈休驗

俾根著之滋豐靈臺齊政分知精祲之祥太史占天兮
測宿離之會上焉兩兩之悉正下焉元元之永賴盛澤
鼓舞洪恩霽霈觀文察變仰魁斗之均明薄山流淵蘇
物情而交泰豈不以天至邈也其監無私星至遠也其
應不欺惟上階之成象合元后之題期或當乎卿大夫
之列或主乎士庶人之卑率皆騰輝而有爛守常而莫
移致此協氣播于大時薰兮解愠之美沛若如膏之滋
順軌而居展開德宣符之效以節而至無鳴條破塊之

為斯蓋位焉不易其尊卑行焉不差其經緯使清微之
令均被乎率上脉沐之澤昭蘇乎品彙化養無外涵濡
罔既相比而列連炳煥於七星仰觀其符知協調於六
氣誠由至仁之化也四表光被太平之治也兆民允懷
藹休功於萬宇兆祥應於三階載於傳則微淒苦之戾
出於記則無姦暴之乖驗斗覆而歲穰求端則正占畢
明而夷貢取類其皆班固志之也曉然示人方朔陳之
也勤於致主修皇德以上動煥台光而可覩符作肅作

聖之事鮮極備極無之苦又何必饗帝于郊始能節乎
風雨

四海以職來祭賦

天下之職能助王祭

孔武仲

上聖孝至諸侯職揚當一人之奉祭罄四海以來王肅
爾駿奔各述修方之舊翼如顯相用嚴肆祀之常夫惟
承祖宗積累之休處康陞崇高之勢尊其親也既重假
廟大其禮也又當配帝化首正宁教流當世本至誠之
恭愛可以感人極四海之欣歡入而助祭時也六服而

內五侯至前同姓異姓兮各奉玉帛大賓大客兮迭承
豆籩並來享以悅懌咸侍祠而吉蠲造此闕庭鎗八鸞
於外屏盛其饌貢洽百禮於中天擇於大射則賓自得
賢誓以常刑則臣無廢職辨其吉禮之掌同厥驩心之
得儼若將事欣然獻力分行遽見居多振鷺之容承命
勤修皆有和羹之德誠以報本反始者神聖之美教尊
祖嚴父者朝家之上儀在盛王之顯若格繇宇以承之
故爾各備上服並承約軼所以周廟陳常美羣公之肅

肅湯孫致饗詠列辟之祁祁衆莫衆於侯方尊孰尊於
君者大邦小國兮至自畿外美味和氣兮實於堂下共
承上化參德遜於前書各盡臣恭協祿將於大雅夫盡
九州之力致五福之膺殊免爵於西漢異責茅於召陵
以極精禋之意用全孝饗之能薦牡惟時推至誠而茂
對執膳有序贊大事以靈承噫德教所加惠心益著外
易俗於海隅下感心於黎庶矧乎茅土分寵親賢同慮
幸丁萃享之時孰不驩虞而來助

舜琴歌南風賦

帝舜作琴以歌南風

舒 亶

帝意雖遠琴音可通欲發揚於孝道遂歌詠於南風寓意五絃寫生成之至德託言萬物荷長養之元功粵其耕稼陶漁至為君聰明睿智積諸已日深致孝之念躬盡事親之理以謂鞠養之德欲言之不足生育之愛欲報之何以緣情指物孰形孝子之思流詠在琴且載南風之旨時其比屋熙乂巖廊靚深包我萬慮寫于一琴協天地以同趣按絲桐而播音作以敘情適在無為之

日薰兮入奏永言至孝之心蓋曰風之於物也有化養之恩覃親之於已也有劬勞之德博眷物理之明甚假琴聲而遠託一彈而歡意悉寫再鼓而羣心咸若按絃而奏聲參韶樂之淳寓象而言義並凱風之作議夫琴求以意而不求乎形器帝樂在孝而升樂於絃歌感民之義豈並於北里思親之志固深於蓼莪藏韻於心非止解一時之愠寄聲於政又將陶萬國之和自是正音暢而化洽幽遐協氣流而時消迄邇閨門聽之則翕爾

和順朝廷聞之則歡然感厲風被乃俗功歸于帝又得
變工之奏同樂於民不煩鄒律之吹阜財於世茲蓋淵
默玩意優游面南歌孝風之遠暨託琴理以中含惜乎
道與世汨樂非德參操變而亡徒起後人之嘆音調而
理空聞前史之談夫豈知音者導樂理之淳淳達孝思
之進進內將報德之罔極外以格民之大順然則歌琴
之意至矣哉莫如虞舜

公生明賦

公不偏黨
明則生矣

許安世

事欲無蔽心宜盡公既守正以宅志遂生明而在躬祛
一意之黨偏不私乎物照百為之情偽罔汨於中若夫
外交事變之繁中固心誠之守以謂虛已鑒物則枉直
昭晰挾情適事則是非紛糾欲庶理之皆辨捨至公而
則不中立不倚始持正於羣倫旁燭無疆遂致明於萬
有無陂無側不阿不偏非妄惡也惡其衆之所棄非作
好也好其衆之所賢蓋依違牽制者固已去矣則明白
洞達者乃其自然百志惟寧居絕傾邪之漸五綦不亂

遂觀昭曠之先蓋夫智因窒而後昏性以私而有黨愛
憎既絕則真偽必審取捨既平則善惡不爽抱純正以
中執涵機靈而內養所以主心善治湯無蔽塞之憂直
道欽承文有照臨之廣豈不以湛靜者人之性偏闇者
性之情知靜為本故虛之則定知闇為害故去之則明
正厥心官始閑邪而制物發為智燭終迪哲以通誠大
抵處有累之地者莫不徇私對無窮之變者鮮能不感凡
適理以非眩由秉心之自克得不保守天質蹈行聖則

周而不比無一曲之蔽情靜之徐清有三知之入德因
知心乃物之鑒公為職之衡係吝既屏純明自生以之
察已則事至不感推而成務則物來敢名是故君子養
源于以致忠邪之判大人正已豈徒無譖訴之行嗟夫
有為者易失其本心無憚者或迷於至理故伍文黨與
以醜正恭顯庸回而嫉士智尚昧於自保識敢期於遠
視惟夫以公正為心明則生矣

智若禹之行水賦

明智之大
如禹行水

孔平仲

古有大智中潛至明何行水以為喻蓋存心之自誠淵
然剏物之謀敏而外發沛若決川之勢順以東傾夫惟
靈萬類而生毓五常之粹不滯於物其端曰智然順其
故則不致於交譎悖其本則浸成於大偽居惟適正委
美質之自然舉若下鴻措安流於無事審利圖害籌安
計危蘊千慮以無感包萬殊而不遺每優游而處此不
汨亂以行之內畜清明陶天真而去詐遠佞疏鑿適地
勢以流卑湛然恬養於中廓然識周於外不滌源而滌

性之垢不治水而治情之害較迹無間成功亦大可通
塞壅順意表以彌綸如決懷襄貫地中而滂沛大抵多
計者流於機巧好辨者溺於空虛其弊明甚惟人戒歟
故我抱靈鑒以無隱導沉幾而自如心常惡其鑿也勢
若排而注諸舜以是而察邇言聰明並決堯因之而急
先務障蔽皆除夫運至計以利仁紹徽謀於平土德一
也何獨議乎智人一也何獨尊乎禹蓋智之於物兮必
順適其理而禹之於水兮亦疏導其苦苟能此道宜効

臯陶之謨一失其原或謂白圭之愈後世蘇張之辯勝
莊老之道鳴其耀才者或籠愚而不正其矯枉者又絕
聖以無營皆與性以相戾譬濬川而逆行亦猶戕柳以
為之椹並非其質振苗而助之長反害其生噫喻玉營
者楚有屈平侔蓍龜者秦聞樗里或以易變而貽誚或
以不知而為恥皆莫若順其性以行焉所謂智者樂水

周以宗強賦

周以同姓
疆國王室

沈初

古之建國制莫如周盛宗室而作庇強王室以承休治

尚以文重恩親於同姓世繇其祚大形勢於諸侯自昔
后稷開基公劉經始盛德物被豐功世美文武大其業
成康繼其軌奚永永以能然蓋親親而得以任先宗子
協圖夾輔之勲本固王家益植太平之趾天亦中奠侯
封外崇大邦小邦兮我所錫壤伯父叔父兮汝其懋功
鞏國勢於寢盛粹民風於大同膺木德以當天王圖以
永法轄星而建屏邦本其隆有袞服以華其躬有金路
以優其命寶玉分賜脰膺均慶所以等異諸臣恩先庶

姓史稱乃德盛陳過歷之期詩大其功茂著維城之詠
豈無異姓與之翊昌豈無列辟與之贊襄推本而治尚
親則強故蒼錄之興起始諸姬而阜康忠厚一時重本
枝而相輔儀刑百世壯基緒於重光至如魯衛之所分
邢茅之所附衆列邦壤一寧國祚歸然盤石之安屹然
寶鼎之措無煩兵革坐收禦侮之功不假山河自得為
藩之固譬夫本之殖枝茂者幹必大水之委源深者流
必長繫爾列辟輔予一王秦室寢微益削五侯之壤漢

邦未善徒恢七國之彊盛哉本本之扶持承承之操術
國五十分比如犬牙之制年七百分繇如瓜瓞之實方
今宗也盛而國也強跨基圖於周室

佚道使民賦

民得終佚
勞固無怨

林希

古者善政陶乎庶民上安行於佚道下無憚於勞身教
思有原得樂趨於農役人知足養胥仰戴於君仁始也
井天下之田比民居之域乃闢疆里乃營稼穡寒則思
為之衣飢則願為之食法既歸厚利茲各得蓋上執其

道務優佚以便民衆樂其生率歡娛而竭力春使之作
熙然悅從冬使之息慶其有終趨時也如鳥獸之至收
成也如寇盜之空利而不庸自足王民之用厚而無困
本茲帝力之功蠢惟有生不能自恤役之所以奉其已
利之然後知其佚仰有以供其祭祀俯足以寧其家室
穀播其始化同幽俗之深壤擊而歌野有堯民之質俾
爾晝出于塾俾爾宵索其綯無力役以奪其節無賦斂
以為之騷曾動作之敢息由醇醲之所陶驅於足用之

原安而服業圖厥終身之養樂以忘勞大抵強民者難
使從利衆者久益慕及克其口腹之欲由竭其手足之
故汝業既畢汝居既固為之一日之蠲怠心已忘優爾
三時之農收功有素然則于其處皞皞其趨俾常產
之各得顧閒民之舉無治貴優游農者願耕耘於野俗相
廉遜老而不負戴於塗噫藏其用者其政神厚其本者
其民愿化而不示其迹勞而不知其困斯道也養生送
死無憾焉何有於怨

王道正則百川理賦


王道公正而百川理

江 沂

物格大順化由至公本一道以持正致百川而會通庶
政修明端若承天之意衆流協應沛然行地之中嘗聞
宰物之工提平在聖大而覆載者既輔相以德廣而融
結者皆管攝以政故彼災祥繫乎邪正惟王有歸往之
蓋在為公而水存乎準之稱遂皆得性何則明審刑罰
持循紀綱宣聰明而作后一好惡以遵王執此之政兮
堅若金石行此之令兮信如陰陽有猷有為屏邪心於

黨附或源或委暢柔德於靈長由是溫洛效珍榮河薦
祉若江漢焉莫不歸其潤若畎澮焉莫不循其理民自
絕於昏墊物大蒙於豐美坦周人之砥道率履大中協
夏后之神功救寧澤水豈非德之隆者高深遠近而必
及道之公者徧覆包含而不偏博既通於化育幽遂遠
於淵泉上廣堯仁有既陂之九澤下殊幽暴無皆震之
三川況夫中和發於聖誠精稷入於神造萬物之類
尚率育而總總五行之本宜分流而浩浩平康在治茲

咸敎於彞倫脉絡交通遂安行於故道向若所持悖繆所
向阿私或盛外家之寵或簡宗廟之儀害既作矣時將
殆而白馬沉而福益遠金堤塞而民已疲是以雅什貽
譏蓋念沸騰之失漢臣建白重興涌溢之悲殊不知水
之為功物資其澤以之浸潤也其功倍以之灌溉也其
利百然而疏導則莫勝其勞壅塞則悉罹其厄惟王道
公正而不頗自然順適



宋文鑑卷十一

欽定四庫全書

集部

宋文鑑卷十二至十四

詳校官監察御史_臣劉湄

助教_臣常循覆勘

總校官降調編修_臣倉聖脉

校對官中書_臣李荃

謄錄監生_臣楊遐齡

欽定四庫全書

宋文鑑卷十二

宋 呂祖謙 編

詩四言

皇雅十首

尹洙

天監受命也自梁至于周兵難不息宋受命統一萬方
馬

天監下民亂靡有定甚武且仁祚厥真聖仁實懷徠武

以執競匪虔匪劉拯我大命自昔外禪月經日營令以
挾制政以陰傾帝初治兵志勤于征奄受神器匪謀而
成淮潞弗虔卒汙叛迹戎輅戒嚴皇威有赫彼寇誅民
吾勇其百殄厥渠魁昏其反側帝朝法宮左右宗公岐
夫悍士以雍以容爾居爾室爾工爾農既息既養惟天
子功

天監四章章八句

西師征蜀也

主用西師岷梁弗賓匪曰負固實交晉人予訓予誓合
我將臣正厥有罪無庸傷民矯矯虎士載摧其壁于嗟
孟侯亦果其策迎師而降靡抗鋒鏑豈獨身謀完是宗
國蜀都既平將臣失律此衆悍驕彼民危慄當塗叫呶
合萬為一匪懷則威帝心是恤帝曰將臣予嘉乃庸廢
命毒民爾弗有終邦典用疑惟罪惟功靡殛而削協于
厥中帝曰孟侯受封于楚淑旂琱戈備物異數俾爾族
姻及乃文武服在王庭靡不有序蜀民呼歌天子威靈

保我者封暴我者刑匪功是和匪弱是陵天子惠民疇敢不承

西師六章章八句

耆武受俘也命將伐南海平金陵俘二王以獻

耆武定功時惟二方淮服其義海南遂荒孰孱而監孰暴而猖自底不諫乃終滅亡帝戒二俘同即爾誅予惟民無辜休息是圖時其輯矣寧威獨夫帝嗟汙邦久罹于兵或暴下以征或敷虐以刑予命中典協于國經民

服德音室家以寧

耆武三章二章八句一章六句

憲古令守臣也削其附庸以強帝室焉

帝懷永圖治古是憲四方守臣惟屏惟翰在昔艱難弗
惠訓典跨都連城高牙以建有土有民肆乃征繕以息
以容終焉叛換凡今帥臣狃厥見聞見匪革亂原曷清
多難帝告庶邦式是典彝元侯顯父戚臣宗支正乃封
圻予一人是毗凡曰附城罔爾俾之畜兵厚賦靡爾得

私母凶而國作福作威天子有命疇敢不祇子孫承承
唯萬世規

憲古二章章十六句

大鹵王師討晉罪也

晉氏之疆粵惟大鹵俗悖而專地扼而固協比幽都蕩
搖邊圉三垂既定克威弗沮帝御六師百萬貔虎翦其
附庸至于城下鋒鏑始交梯衝如舞蠹爾孱王請附降
據我士奮揚願究吾武皇帝曰吁念彼黎庶匪鯨匪鯢

復為王士晉郊既平九區以寧陳功太廟告假威靈在
昔武王于商觀兵惟我藝祖亦勤于征匪貸晉罪侯厥
貫盈聖作聖繼巍巍相承皇矣二后功莫與京

太鹵二章一章二十二句一章十四句

帝籍修故典也躬耕以勸農焉

帝籍于郊典儀具陳務農以訓供祀以勤祀在于誠匪
勤于人訓農以實匪訓以文帝謹二物乃躬乃親公侯
卿士暨厥庶民千旬有制飭哉惟寅帝賚高年式宴且

喜種種黃髮族丘而議我生艱難暴亂以繼耳
鉦金鼓目狎戎器皇其我圖親講農事有子有孫力田孝悌鼓舞至仁薰焉如醉

帝籍二章章十四句

庶工任賢也

帝咨庶工疇其輔予俊乂以登厥勞乃圖匪忘舊勲非賢勿俞巍巍衮台盛德以居任賢伊何昌言是庸勉告爾猷罔恤迺躬豈無猥辭怫予衷予不爾疵爾無面

從始時從官戎容揚揚今帝左右儒冠煌煌朝廷以尊
文物典章得人之盛奕世重光

庶工三章章八句

帝制北方請盟也

帝制萬邦罔有弗賓山陬海澨羈而勿臣威格三方稽
顙獻珍單于革心願交使人帝謀公卿列侯庶校咸曰
彼心暴戾陰狡既擾我疆復利吾寶無若勵兵襲其還
道皇曰有衆予實念茲戰無必勝矧其歸師借曰大獲

疇能盡之益俾饜深毒吾朔陞乃俞其盟北州以綏在
漢世宗抗威兵戎暴農算商經用弗克中土震騷漢南
始空降及後世猶稱厥功初穆聖考德無與偕匪勤于
兵北人遂來逮是三紀遠俗以懷生民休息嗚呼仁哉

帝制五章四章八句一章十句

皇治恤刑也

帝仁于明刑在位者以寬恤為治焉皇底其治欽哉惟
刑在疑而宥罔察為明愛怒弗肆孰為重輕毋一弗辜

惟典之平前世理官倚法以刻匪彼為仇蓋曰任職令
之蔽獄務正其辟鑒于前人繫我仁德皇德在仁寢而
成風公侯卿士靡不率從麇卵萌生成保厥終不鄙不
天樂哉融融

皇治三章章八句

太平封祀告成功也

噫太平無象兮世烏得而知維盛德可迹兮其封祀之
儀東岱宗兮西汾睢禮上帝兮賓地祇皇有征兮吾民

以嬉皇有祈兮吾民是私天數佑兮俾皇之釐永世億
寧兮無疆之基

太平一章章八句

定州閣古堂

富弼

天下十八道惟河北最重河北三十六州軍就其中又
析大名府定州真定府高陽關為四路惟定州最要定
為一路治所實天下要重之最知是州者兼本路兵馬
都部署居則治民出則治兵非夫文武才全望傾于時

者不能安疆場屏王室也然自國初已來專以武臣帥諸路慶厯七年甘陵妖賊據城叛河北妖黨相搖以謀應卒驕將悞人心大震天子悟始議選儒臣帥四路以督諸將迺起知鄆州資政殿學士給事中昌黎韓公帥真定以遏亂萌明年春賊誅人安既而夏大雨河決商胡東北入于海河北災人復不寧流徙失業者四出咸不翅千里僵殍滿道天子恤然且虞他姦遂以公帥定既重天下宿兵素多屬傷殘之後官民枵困征賦逃

無幾而兵不少減兵襲舊幸歎益驕以悍公夙夜裁整以威以懷兵之驕不從令者捽其首惡斬以徇略為條教餘怙怙就約不敢譁于室至有調發者遠而彌戢如公親臨已而招集逋亡四流爭還如啼孩奔父母惟恐其後至則克然各得其欲農無廢隴賦有餘粒不旁誅橫斂而上下足堙漏補罅一面完固公既擊彊梗之兵又育彫瘵之民左行斧鉞右哺飲食亂者畢治亡者畢存禮法政教向之人所不得聞者今漸濡酣飲無不貫

徹自是邊人革其耳目新其肝腸優為而樂從故人易
治而功成速也又明年秋天子圖公之功詔加大學士
公先嘗表其志幸終三年不願亟易也至天子抑騎召
而使即以授姑遂公請亦以慰斯人愛公之心也公惕
寵處官雖無事未嘗輒自豫念兵與民之急宜無過者
矧臨要重之路憂虞所繫凡是繼畫不可以無法迺擇
取歷代賢守良將總若干人行事創大屋以類相次繪
于周壁榜之曰閱古堂蓋欲閱古之人所為而為之法

也噫公雅文傑武自當視乎古人且天下方遜公入輔
以致太平若其安疆場屏王室豈庸考古而後能哉實
公冲然不自有其有而歸乎古人也其懸知來者不師
繪事而公是師也雖然闢古蒐善惠人驚已公之意謂其
至矣乎公郵問索詩因粗序所致之旨以誌其始而示
于後詩曰

朔方之兵勁于九土尤勁而要粵惟定武兵勁在馭用
則羆虎失馭而勁驕不可舉曰保曰貝閉壁連阻武爵斯守

束手就擒皇帝曰噫汝武曷取有敝必革以儒于撫公
來帥定始以威怒有兵悍橫一用于奔連營怛之膽栗
腰偃既懼而教如哺如乳以刺以射以鉦以鼓無一不
若師師旅旅列城自刺靡不和附陰沴為梗降此大雨
大河破洩在河之潁民被黜墾田入污莽流離蕩析不
得其所公感曰吁予敢寧處迺大招來乃大保聚乃營
帛粟寒衣飢茹民歸而安水下孰禦彊弱死生由公復
慮曰義曰仁震肅春煦合和蒸天天順以序公境獨稔

卷十二
爰麥爰黍公俗獨樂夫耕婦耘人雖曰康公亦奚豫謂
此一方民與兵具務劇任重稽古人裕人皆謂公與古
為伍公文化民公武禦侮何思古人公不自許遂擇奇
將繪于堂宇列其行事指掌可數前有古人在我門戶
後有來者依我牆堵斯堂勿壞有堂有故堂之不存來
者曷覩宏乎煥乎千載是矩

裕禮頌聖德

梅堯臣

溥哉孝享將事于寧文武卿士冠劔在庭奚俟帝齋風

霰其零風霰不已鉤陳豹尾龍旂太常立列北帝居
路寢百辟就次至于穀旦漫漫翳翳帝入靈宮左撞黃
鍾陞階置玉日氣瞳矐鴻鴻杲杲氛驅陰掃宿于太宮
月星皓皓侍祠之臣鵠舉鷺振或捧其匱或進其巾輔
相夾導俯僂鮮鱗圭瓚以陳登歌以均東向虛位發爵
親親平明帝還紫宸序班望帝之顏穆穆閑閑簷步廊
廊雪浮陽光大楹爛爛朱陛煌煌稱祝萬壽萬壽無疆
却登寶輿以御端門揭鷄肆赦雷動乾坤于時都人于

時婦女子時兆庶異口同語天子萬年仁聖之主臣時
執策與物咸覩敢播于詩庶聞九土

魏京

劉敬

上二十年治建北京以章明先帝巡狩之德以孝思于
下于時野之處士或相與議曰蓋文王都豐武王都鎬
豐鎬之間不能數百里文武之位不過侯伯而詩人乃
以聖人之德天子之事歌之有如聖朝德位相侔述作
相繼而無適駿烝哉之詩此乃處士之罪非公卿之過

也乃考聲謨辭以繼大雅垂之無窮其文曰

皇作大都大都雄雄奄定北國四方來同皇曰卿士在
昔聖考祇適文武維慈幼老天監在上既有明德乃命
于下罔有不復匪允命之亦章慶之匪允服之亦保育
之時維獫狁侮予之疆靡度靡虞跳呼以狂業業烝飶
載震載驚侵魏及澶羣心不寧帝奮厥武百萬其士匪
怒以棘于三十里如虎如貔如霆如雷靡有遠邇天子
其來天子來止士增其喜孰偷其生以不奮興驅之渾

渾攘之賁賁靡有軋張殲厥鯨鯢或獻其寶或請其命
帝振于旅維時既定屹屹魏土山河之固匪山河則固
維上帝伊既閱爾弓既橐爾矛獵狁臣之四方是休皇
曰卿士聖孝之德允于孝思孝思維則爾祚于魏以作
我都以赫厥靈俾後勿踰皇曰卿士維帝時功時亦維
人維寇萊公爾敬爾止弼予于治期爾前人用迪爾事
皇曰卿士維帝作武垂是萬年莫敢予侮泰山之封后
土之禪予監若茲維天是眷翼翼魏土天子國之穆穆

原廟聖人則之孰為彊暴來覲俾讐于威于忠是
訓顯顯天子孝德自躬率是休烈遂致時雍河水東注
昭哉禹績時萬斯年天子之德

古風

劉 敞

子欲富矣何用為富農不若工工不若賈子欲貴矣何
用為貴德不若名名不若勢粹兮純兮三五之人兮終
窶且貧兮孰知其珍兮

閔雨

劉 敞

臣伏見春首以來天久不雨歷官李用晦治大衍軌草
太醫趙從古治黃帝六氣咸以謂風旱歲惡然陛下焦
心勞意側躬修德蕃樂損膳議獄宥過以迎導善氣爰
及言事得罪者唐介杜樞之徒復特見甄序小大之臣
莫不欣然人情悅則天氣和矣乃三月己巳日八而雨
至于庚午詩不云乎益之以霡霂既優既渥既霑既足
生我百穀以此見聖人之德與天相符言出而物應行
發而神助雖水旱之占有常數者猶不能違之況其眇

者乎竊觀詩書所載盛德之君至誠動天之速未有及
陛下者也臣不勝鼓舞之至謹撰閔雨詩一首十三章
章六句投進以聞

堪輿綱緼一晦一明或沉而毀或亢而暘自古以然世
習為常民生冥冥靡究靡知其幸而吉不幸而災猖狂
妄行唯所遇之天命降監在我元聖兼覆慶裕四方既
定維民之恤無所疵病伊年暮春旱久不雨人曰時哉
歷有常數禹湯之賢莫能弗遇帝獨喟息是豈足言化

育萬物若鍔以埏患在誠薄不能動天退而齋心淵默
以居鐘鼓不抃宴游不娛左右肅然一懷瞿瞿疏獄省
刑與物更始內恕孔悲引咎在己爰及四海愚智咸喜
追悟謹直褒進淹滯聲色無迓式序在位嬖習權近懾
威屏氣已已乃雨若有鬼神淒淒其風渰渰其雲自東
阻西罄無不均匪震匪拔匪溢匪洩生我百穀區萌畢
達以亭以食小大胥悅天子之德視雨之施肇自京師
達于四裔無有遠邇孚我君惠天子之政視雨之時養

老長幼速哉熙熙更化易俗而民不知天子之慶視雨之積自天降康時萬時億眉壽無疆以靖四國

新田

王安石

唐治四縣田之入於草莽者十九民如寄客維簡其賦緩其徭而不可以必留尚書比部郎中趙君尚寬之來問弊於民而知其故乃使推官張君恂以兵士興大渠之廢者一大陂之廢者四諸小渠陂教民自為者數十一年流民作而相告以歸二年而淮之南湖之北操囊

邦以率其妻子者其來如雨三年而唐之土不可賤取
昔之菽粟者多化而為稔環唐皆水矣唐獨得歲焉船
漕車輓負擔出于四境一日之間不可為數而唐之私
廩固有餘循吏之無稱於世久矣予聞趙君如此故為
作詩詩曰

離離新田其下流水孰知其初灌莽千里其南背江其
北逾淮父抱子扶十百其來其來僕僕慢我雜屋趙侯
勗之作者丕饑歲仍大熟飽及鷄鶩僦船與車四鄙出

穀今游者處昔止者流維昔牧我不如今侯侯來適野
不有觀者稅于水濱問我鰥寡侯其歸矣三歲于茲誰
能止侯我往來之

潭州新學

王安石

治平元年天章閣待制興國吳公治潭州之明年正月
改築廟學于城東南越五月告成孔子用幣潭人曰公
為善政以德我又不敢我而為此學以嘉我士子誰能
詩乎以誦我公於無窮皆辭不敢乃使來請詩曰

有嘉新學潭守所作守者誰歟仲庶氏吳振養矜寡衣之褰襦黔首鼓歌吏靜不求乃相廟序生師所廬上漏旁穿燥濕不除曰嘻遷哉迫阨卑污當其懷時適可以謀營地慮工伐梗楠楮徹故就新為此渠渠潭人來止相語而喜我知視成無豫經始公升在堂從者如水公曰誨汝潭之士子古之讀書凡以為已躬行孝悌由義而仕神聽汝助況於閭里無實而夸無聖自是雖大得意吾猶汝恥士下其手公言無尤請詩我歌以遠公休

明堂樂章二首

王安石

皇帝還大次懋安之曲

有奕明堂萬方時會宗子聖者作帝之配樂酌虞典禮
從周制釐事既成於皇來暨

歌安之曲

穆穆在堂肅肅在庭於顯辟公來相思成神既歌止有
聞惟馨錫我休嘉燕及羣生

顏樂亭

為孔周翰作

程顥

天之生民是為

一作惟

物則非學非師孰覺孰識聖賢之

分古難其明有孔之遇有顏之

一作其

生聖以道化賢以

學生

一作行

萬世心目破昏為醒周爰闕里惟顏舊止巷

汙以榛井堙而圯鄉閭蚩蚩弗視弗履有卓其誰師門

之嗣追古念今有惻其心良價善諭發帑出金巷治以

闢井濞而深清泉澤物佳木成陰載基載落亭曰顏樂

昔人有心予忖予度千載之上顏惟

一作為

孔學百世之

下顏居孔作盛德彌光風流日長道之無疆古今所常

水不忍廢地不忍荒嗚呼正學其何可忘

何公橋

蘇軾

天壤之間水居其多人之往來如鷁在河順水而行雲駛
鳥疾維水之利千里咫尺亂流而涉過膝則止維水之
害咫尺千里沔彼濫觴蛙跳鯁游溢而懷山神禹所憂
豈無一木休此大懷舞于盤渦水析雷解坐使此邦畫
為兩州鷁犬相聞秦越莫救允毅何公甚勇于仁始作
石梁其艱其勤將作復止更此百難公心如鐵非石則

堅公以身先民以悅使老壯負石如負其子疏為五虹
隱為金堤直欄橫檻百賈所栖我來與公同載而出謹
呼填道抱其馬足我歎而言視此滔滔未見剛者孰為
此橋願公千歲與橋壽考持節復來以慰父老如朱仲
卿食于祠鄉我作銘詩子孫不忘

觀棋

蘇軾

予素不解碁嘗獨遊廬山白鶴觀觀中人皆闔戶晝寢
獨聞碁聲於古松流水之間意欣然喜之自爾欲學然

終不解也兒子過乃粗能者僭守張中日從之戲予亦
偶坐竟日不以為厭也

五老峰前白鶴遺址長松蔭庭風日清美我時獨游不
逢一士誰與慕者戶外屨二不聞人聲時聞落子紋枰
坐對誰究此味空鉤意釣豈在魴鯉小兒近道剝啄信
指勝固欣然敗亦可喜優哉游哉聊以卒歲

和陶淵明時運

蘇軾

丁丑二月十四日白鶴峰新居成自嘉祐寺遷入詠淵

金匱要略卷之六
卷十二
明時運詩云斯夕言息其廬似為余發也乃次其韻長
子邁與予別三年矣挈攜諸孫萬里遠至老朽憂患之
餘不能無欣然

我卜我居居非一朝龜不吾欺屆此江郊廢井已塞喬
木干霄昔人伊何誰其裔苗下有碧潭可飲可濯江山
千里供我遐矚木固無脛瓦豈有足陶匠自至嘯歌相
樂我視此邦如涖如沂邦人勸我老矣安歸自我幽獨
倚門或揮豈無親友雲散莫追旦朝丁丁誰欵我廬子

孫遠至笑語紛如剪髮垂髻覆此瓠壺三年一夢乃復見余

和陶淵明勸農

蘇軾

予以紹聖元年十月到惠州四年五月再貶瓊州別駕傲睨之餘慨然有感黎蠻風俗之異乃和陶淵明勸農詩以告其有知者

咨爾漢黎均是一民鄙夷不訓失豈其真怨忿劫質尋戈相因欺謾莫訴曲自我人天禍爾上不麥不稷民無

用物怪珍是植播厥薰木腐餘是穡貪夫污吏鷹擊狼
食豈無良田撫撫平陸獸蹤交蹄鳥喙諧穆驚磨朝射
猛狝夜逐芋羹諸糜以飽者宿聽我苦言其福永久利
爾鉏耜好爾隣偶斬艾蓬蒿南東其畝父兄搢挺以扶
游手天不假易亦不汝置春無遺勤秋有後冀雲舉雨
決婦姑畢至我良孝愛袒跣何愧逸諺戲侮博奕頑鄙
投之生黎俾勿冠履霜降稻實千箱一軌大作爾社一
醉醇美

江郊

蘇軾

惠州歸善縣治之北數百步抵江少西有盤石小潭可以垂釣作江郊詩云

江郊蔥蘢雲水舊絢綺岸斗入洄潭輪轉先生悅之布席閒燕初日下照潛鱗俯見意釣忘魚樂此竿綫優哉悠哉玩物之變

洄酌亭

蘇軾

瓊山郡東衆泉感發然皆冽而不食丁丑歲六月軾南

遷過瓊始得雙泉之甘於城之東北隅以告其人自是
汲者常滿泉相去咫尺而異味庚辰歲六月十七日遷
于合浦復過之太守承議郎陸公求泉上之亭名與詩
名之曰洞酌其詩曰

酌彼兩泉挹彼注茲一餅之中有澠有溜以淪以烹衆
咸莫齊自江徂海浩然無私豈弟君子江海是儀既味
我泉亦嚙我詩

宋文鑑卷十二

欽定四庫全書

宋文鑑卷十三

宋 呂祖謙 編

詩

樂府歌行

雜言附

桃花犬歌呈修史錢侍郎

李 至

宮中有犬桃花名絳繒圍頸懸金鈴先皇為愛馴且異
指顧之間知上意珠簾未卷扇未開桃花搖尾長生至

夜靜不離香砌眠朝饑祇傍御牀餽彩雲路孰不勞牽
瑤草風微有時吠無何軒后鑄鼎成忽遺弓劍棄寰瀛
迢迢松闕伊川上遠逐龍輜十數程兩皆連連似垂淚
骨見毛寒頓憔悴萬人見者倍傷心微物感恩猶若是
韓盧備獵何足嘉西旅克庭豈為瑞聞君奉詔修實錄
一字為褒應不曲白魚赤鴈且勿書願君書此懲浮俗

江南春

寇準

波渺渺柳依依孤村芳草遠斜日杏花飛江南春盡離

腸斷蘋滿汀洲人未歸

西遊曲

錢易

花銷秋老白日短敗紅荒綠迷空館擬將清血洒昭陵
幽谷蛇啼半山晚十年辭家勤獻書王孫不許延公車
江頭祖廟祭無血重門生草寒離離我有黃金三尺劍
姦骨餘痕古波豔佩入函關無故人玉握凋零七星暗

伐棘篇

路振

伐棘何所山之巔秋風騷飈棘子丹折根破祗堅且頑

斷夫趙趙汗污顏攢鋒束芒趨道還稭之森森繚長藩
暮冬號風雪暗天漏寒不鳴守犬眠主人堂上多金錢
東陵暴客來窺垣舉手觸鋒身墮顛千矛萬戟爭後先
襟袖結裂不可揜蹠破指傷流血殷神離氣沮走踣蹙
數尺之牆弗復攀索頭醜奴搔河孺朔方屯師連七年
木波馬領沙填填氣脉不絕如喉咽官軍虎怒思吼軒
強弩一發山河穿將不叶謀空即安翫養小醜成兇顛
推蜀挽粟徒喧喧邊臣無心靜國艱為余諷此伐棘篇

吳中曉寒曲

王琪

大澤穹天莽同色，碧瓦閭門曉花白。
石巖左右斷行人，洞庭一夜冰千尺。
曾持漢節單于壘，北風如刀割人耳。
知憐凍足幸雙推，一生不向胡廷履。
憑誰贈我紫綺裘，中吳風土清且柔。
令嚴氣正天地肅，長歌白苧臨寒流。
玉蘭酒熟金醅溢，大白連雲尚殊克。
書牕半掩晝始開，幾日紅梅斷消息。

清輝殿觀唐明皇山水石字歌

王琪

皇家四葉恢聖功天臨日燭清華戎漢條靜治洽柔教
老心稽古開神聰有唐英主稱好文仙毫灑落驅風雲
壯哉山水有奇字煥乎八法存翠珉自從棄置咸陽道
蘇駸煙滋委宮草天開神贊會休辰甄收再作皇居寶
如何淪廢三百春迎逢睿鑒來紫宸奎鈎粲粲光華動
羣玉森森氣象新丹蘂春妍瑞靄深文梁藻棟結芳材
鴻翔鳳翥徑方文杯流泉涌蒙親臨鯨臣榮幸從金輿
鈎婉魂驚拭目初多慙攬筆非清藻唯慶千齡際帝圖

鷓鴣詞 效王建作

歐陽修

龍樓鳳閣鬱崢嶸，深宮不聞更漏聲。
紅紗蠟燭愁夜短，綠窓鷓鴣催天明。
一聲兩聲人漸起，金井轆轤聞汲水。
三聲四聲促嚴粧，紅靴玉帶奉君王。
萬年枝軟風露濕，上下枝聞一作問聲轉急。
南衙促仗三衙列，九門放鑰千官入。
重城禁鎖瑣池臺，此鳥飛從何處來。
君不見潁河

東岸村陂闊，山禽野鳥常嘲啗。
田家惟聽夏鷓聲，

鷓鴣西京

村人謂之夏鷓

夜夜壠頭耕曉月，可憐此樂獨吾知。
眷戀君恩

今白髮

明妃曲

歐陽修

漢宮有佳人天子初未識一朝隨漢使遠嫁單于國絕
色天下無一失難再得雖能殺畫工於事竟何益耳目
所及尚如此萬里安能制夷狄漢計誠已拙女色難自
誇明妃去時淚漚向枝上花狂風日暮起飄泊落誰家
紅顏勝人多薄命莫怨春風當自嗟

廬山高贈同年劉中允歸南康

歐陽修

廬山高哉幾千仞兮根盤幾百里截然屹立乎長江長
江西來走其下是為揚瀾左里兮洪濤巨浪日夕相吞
撞雲消風止水鏡靜泊舟登岸而遠望兮上摩青蒼以
晻霫下壓后土之鴻龐試往造乎其間兮攀緣石磴窺
空千巖萬壑響松檜懸崖巨石飛流淙水聲聒聒亂人
語六月飛雪灑石砮仙翁釋子亦往往而逢兮吾嘗惡
其學幼而言囀但見丹崖翠壁遠近映樓閣晨鐘暮鼓
杳靄羅幡幢幽花野草不知其名兮風吹露濕香澗谷

時有白鶴飛來雙幽尋遠去不可極便欲絕世遺紛癯
羨君買田築室老其下挿秧盈疇兮釀酒盈缸欲令浮
嵐暖翠千萬狀坐卧常對乎軒窓君懷磊砢有至寶世
俗不辨珉與玳策名為吏二十載青衫白首困一邦寵
榮聲利不可以苟屈兮自非青雲白石有深趣其氣兀
肆何由降丈夫壯節似君少嗟我欲說安得巨筆如長
杠

紫石屏歌寄蘇子美

歐陽修

月從海底來行上天東南正當天中時下照千尺潭潭
心無風月不動倒影射入紫石巖月光水潔石瑩淨感
此陰魄來中潛自從月入此石中天有兩耀分為三清
光萬古不磨滅天地至寶難藏緘天公呼雷公夜持巨
斧墮斲巖墮此一片落千仞皎然寒鏡在玉奩蝦蟇白
兔走天上空留桂影猶杉杉景山得之惜不得贈我意
與千金兼自云每到月滿時石在暗室光出簷大哉天
地間萬怪難悉談嗟予不度量每事思窮探欲將兩耳

目所及而與造化爭毫纖煌煌三辰行日月尤尊嚴若
令下與物為比去聲擾擾萬類將誰瞻不然此石竟何物
有口欲說嗟如鉗吾奇蘇子胸羅列萬象中包含不惟
胸寬膽亦大屢出言語驚愚凡自吾得此石未見蘇子
心懷慙不經老匠先指汝有手誰敢施鐫鑿呼工畫石
持寄似幸子留意其無謙

山鳥

梅堯臣

婆餅焦兒不食爾父向何之爾母山頭化為石山頭化

石可祭何遂作微禽啼不息

送撫州通判袁世弼寺丞

梅堯臣

帆疏疏纖綠蒲二十四幅輕江湖高秋逆水上天去朝
過瓜步暮濡須長風沙頭問鯉魚大孤山側鳴寒鳥魚
腹無書報家信憑烏為到西山區西山松栢應更好及
取之官來拜掃

永叔月石硯屏歌

蘇舜欽

日月行上天下照萬物根向之生榮背則死故為萬物

生死門東西兩交征晝夜不暫停胡為號山石留此皎
月痕常存桂樹散疎陰有若圖畫成永叔得之不能曉
作歌使我窮其源且疑月入此石中分此兩曜三處明

或云蟾

兔一作

蜃好溪山逃遁出月不可關浮波穴石恣

所樂常娥孤坐初不覺玉杵夜無聲無物來搗藥常娥
驚推輪下天自尋捉遶地掀江踏山嶽二物驚奔不復
見留比玉輪之迹在青壁風雨不可剝此說亦詭異予
知未精確物有無情自相感不間幽微與高邈老蚌吸

月月降胎水犀望星星八角彤霞爍石變靈砂白虹貫
巖生美璞此乃西山石久為月照著歲久光不滅遂有
團圓月寒輝籠籠出輕霧坐對不復嗟殘缺蝦蟇從汝
惡腎吻可能食此清光沒玉川子若在見必喜不徹此
雖石中時有靈光發土怪山鬼不敢近照之僵仆肝腦
裂有如君上明下燭萬類無遁形光艷百世無虧盈

荒田行

劉 敞

大農棄田避征役小農挈家就兵籍良田茫茫少耕者

秋來雨止生荆棘縣官募兵有著令募兵如率官有慶
從今無復官勸農還逐魚鹽作亡命

桃源行

王安石

望夷宮中鹿為馬秦人半死長城下避世不獨商山翁
亦有桃源種桃者此來種桃經幾春採花食實枝為薪
兒孫生長與世隔雖有父子無君臣漁郎漾舟迷遠近
花間相見驚相問世上那知古有秦山中豈料今為晉
聞道長安吹戰塵春風回首一霑巾重華一去寧復得

天下紛紛經幾秦

食黍行

王安石

周公兄弟相殺戮李斯父子夷三族富貴常多患禍嬰
貧賤亦復難為情自隨衣食南與北至親安能常在側
謂言黍熟同一炊歛見隴上黃離離遊人中道勿不返
從此食黍還心悲

杜甫畫像

王安石

吾觀少陵詩謂與元氣侔力能排天幹九地壯顏毅色

不可求浩蕩八極中生物豈不稠醜妍巨細千萬殊竟
莫見何以雕鏤惜哉命之窮顛倒不見收青衫老更斥
餓走半九州瘦妻僵前子仆後攘攘盜賊森戈矛吟哦
當此時不廢朝廷憂嘗願天子聖大臣各伊周寧令吾
廬獨破受凍死不忍四海赤子寒飈飈傷屯悼屈止一
身嗟時之人我所羞所以見公像再拜涕泗流推公之
心古亦少願起公死從之游

題燈

陳烈

富家一椀燈太倉一粒粟貧家一椀燈父子相聚哭風
流太守知不知惟恨笙歌無妙曲

鞠歌行

張載

鞠歌明然兮邈余樂之不猶宵耿耿其尚寐日孜孜焉
繼予乎厥修井行惻兮王收曰曷賈不售兮阻德音其
幽幽述空文以繼志兮庶感通乎來古摩昔為之純英
兮又申申其以告鼓弗躍兮麾弗前千五百年寥哉寂
焉謂天實為兮則吾豈敢惟審已兮乾乾

君子行

張載

君子防未然見幾天地先開物象未形弭災憂患前公
旦立無方不恤流言喧將聖見亂人天厭懲孤偏竊攘
豈予思瓜李安足論

上書行

劉敞

仕不至二千石賈不至五百萬此事夸者憂而非志士
歎君不見下邳少年受書起幄中運籌制千里功成不
受二萬戶拂衣歸從赤松子君不見計倪半策誅強吳

鴟夷扁舟浮五湖三致千金不自擅至今籍籍宗陶朱
大賢富貴不為己心事邈與常人殊逢時致身如反手
雲烝龍變無時無君勿愛上書獻賦稱賢豪刺繡倚市
相矜高丈夫昔曾笑徒勞商賈旦旦爭錐刀

茂陵徐生歌

劉 攽

茂陵徐生老且迂一心區區長信書拜章北闕三待報
意欲霍氏安無虞那知世主心不同積惡未極難為功
徙薪曲突事不爾壯侯幾人當受封高岸為谷丘淵移

魯酒之薄邯鄲圍人生快已各以時舊意望君君不思

熙州行

劉敞

自胡請盟供貢職關西二紀剽兵革胡人歲來受金帛
地雖國本胡不惜帝家將軍勇無敵謀如轉圜心匪席
精誠動天天不隔鑿空借籌皆碩畫賈生屬國試五餌
買臣朔方發十策偏師倏然盡西海一月三捷猶餘力
百蠻解辮慕冠帶五郡掃地開城壁蔥嶺陂陀蒲類深
回笑秦并與禹績尚書論功易等差御史行封自明白

武功貽爵十萬金，徹侯印組丈二尺。奮行過望，理自爾。
少從進，熟來無極憶。昔漢武開西域，天下騷然苦征役。
哀痛輪臺，置肥美，割棄造陽，損斗僻。豈知洮河宜種稻，
此去涼州皆白麥。女桑被野，水泉甘。吳兒力耕，秦婦織。
行子雖為萬里程，屋人坐盈九年食。熙州歡娛，軍事息。
天王聖明，丞相直。

江南曲

沈括

新秋拂水無行跡，夜夜隨潮過江北。西風卷雨上半天，

渡口微涼含晚碧城頭鼓響月脚垂天際籠煙鎖山色
高樓索莫臨長陌黃竹一聲無北客時平田苦少人耕
唯有蘆花滿江白

織婦怨

文同

擲梭兩肘倦踏籥雙足趺三日不住織一足纔可剪織
處畏風日剪時審刀尺皆言邊幅好自愛經緯密昨朝
持八庫何事監官怒大字彫印文濃和油墨汚父母抱
歸舍拋下中門下相看各無語淚迸若傾瀉質錢解衣

服買絲添上軸不敢輒下機連宵停火燭當須了租賦
豈暇恤襦袴前知寒切骨甘心扇翫露里胥踞門限叫
罵嗔納晚安得織婦心變作監官眼

自君之出矣

文同

自君之出矣弔影度晨夕中門一步地未省有行迹聞
闌足儀檢常恐犯繩尺欲寄錦字書知誰者云的

五原行

文同

雲蕭蕭草搖落風吹黃沙昏寂寞胡兒滿窟卧寒日卓

旗繫馬人一匹夜來烽火連籌起銀鵲呼兵捷如鬼齊
集弓刃上隴行犬譟狐嘒繞空壘羗人鈔暴為常事見
敵不爭收若雨自高聲勢敍邊功歲歲年年皆一同將
軍玩寇五原上朝廷不知但推賞

法惠寺橫翠閣

蘇軾

朝見吳山橫暮見吳山從吳山故多態轉側為君客幽
人起朱閣空洞更無物惟有千步岡東西作簾額春來
故國歸無期人言悲秋春更悲已泛平湖思濯錦更看

橫翠憶我着彫欄能得幾時好不獨憑欄人易老百年
興衰更堪哀懸知草莽化池臺遊人尋我舊遊處但覓
吳山橫處來

於潛僧綠筠軒

蘇軾

可使食無肉不可使居無竹無肉令人瘦無竹令人俗
人瘦尚可肥俗士不可醫傍人笑此言似高還似癡若
對此君仍大嚼世間那有揚州鶴

河復

蘇軾

熙寧十年秋河決澶淵注鉅野入淮泗自澶魏以北皆絕流而齋楚大被其害彭門城下水二丈八尺七十餘日不退吏民疲於守禦十月十三日澶州大風終日既止而河流一枝已復故道聞之喜甚庶幾可塞乎乃作河復詩歌之道路以致民怨而迎神休蓋守土者之志也

君不見西漢元光元封間河決瓠子二十年鉅野東傾淮泗滿楚人恣食黃河鱸萬里沙回封禪罷初遣越巫

沈白馬河公未許人力窮
薪芻萬計隨流下
吾君仁聖如帝堯
百神受職河神驕
帝遣風師下約束
北流夜起澶州橋
東風吹凍收微綠
神功不用淇園竹
楚人種麥滿河淤
仰看浮槎棲古木

禽言二首

蘇軾

南山昨夜雨西溪不可渡
溪邊布穀兒勸我脫破袴
不

辭脫袴溪水寒水中照見催租瘢

土人為布穀為脫却破袴

姑惡姑惡姑不惡
妾命薄君不見東海孝婦死
作三年

乾不如廣漢龐姑去却還

姑惡水鳥也俗云婦以姑虐死故其聲云

書王定國所藏煙江疊嶂圖

蘇軾

江上愁心千疊山浮空積翠如雲煙
煙耶雲耶遠莫知
煙空雲散山依然但見兩崖蒼蒼暗絕谷
中有百道飛來泉縈林絡石隱復見下赴谷口為平川
平山開
林麓斷小橋野店依山前行人稍度喬木外
漁舟一葉江吞天
使君何從得此本點綴毫末分清妍
不知人間何處有此景
徑欲往置二頃田君不看武昌樊石幽絕

處東坡先生留五年春風搖江天漠漠暮雲卷雨山娟
娟丹楓翻鷗伴水宿長松落雪驚晝眠桃花流水在人
世武陵豈必皆神仙江山清空我塵土雖有去路尋無
緣還君此畫三歎息山中故人應有招我歸來篇

書晁說之考牧圖後

蘇軾

我昔在田間但知羊與牛川平牛背穩如駕百斛舟舟
行無人岸自移我坐讀書牛不知前有百尾羊聽我鞭
聲如鼓擊我鞭不妄發視其後者而鞭之澤中草木長

草長病牛羊尋山跨坑谷騰趨筋骨強煙蓑雨笠長林
下老去而今空見盡世間馬耳射東風悔不長作多牛
翁

鶴歎

蘇軾

園中有鶴馴可呼我欲呼之立坐隅鶴有顏色則睨余
豈欲臆對如鵬乎我生如寄良琦孤三尺長頸閭瘦軀
俛啄少許便有餘何至以身為子娛驅之上堂立斯須
投以餅餌視若無嘖然長鳴乃下趨難進易退我不如

荔枝歎

蘇軾

十里一置飛塵灰五里一候兵火催填坑赴谷相枕藉
知是荔枝龍眼來飛車跨山鵲橫海風枝露葉如新採
宮中美人一破顏驚塵濺血留千載永元荔枝來交州
天寶歲貢取之涪至今欲食林甫肉無人舉觴酹伯游
我願天公憐赤子莫生尤物為瘡痍君不見武夷溪邊
粟粒芽前丁後蔡相籠加爭先取寵稱入貢今年鬪品
充官茶吾君所乏豈在此致養口體何陋耶洛陽相君忠

孝家近時亦進姚黃花

東方書生行

蘇轍

東方書生多愚魯閉門讀書口生土
憲中白首抱遺經自信此書傳父祖
辟雍新說從上公策除僕射酬元功
太常弟子不知數日夜吟諷如寒蟲
四方窺覘不能得一卷百金猶復惜
康成穎達棄塵灰老聃瞿曇更出入
舊書句句傳先師中途欲棄還自疑
東隣小兒識機會半年外舍無不知
乘輕策肥正年少齒疎唇腐真堪

笑是非得失付它年眼前且買先騰蹕

和謝定征南謠

黃庭堅

傳聞交州初陸梁東連五溪西泚羗軍行不斷蠻標盾
謀主皆收漢叛亡合浦譙門腥血沸晉興城下白骨荒
謀臣異時坐致寇守臣今日愧包桑已遣戈船下灘水
更分樓船浮豫章頗聞師出三鵠路盡是中屯六郡良
漢南食麥如食玉湖南驅人如驅羊營平請穀三百萬
祁連引兵九千里少府私錢不敢知大農計歲今餘幾

土兵蕃馬貌虎同蝮蛇毒草莖竹中未論芻粟捐金費
直思瘴癘連營空我思荊州李太守欲募蠻夷今自攻
至今民歌尹殺我州郡擇人誠見功張喬祝良不難得
誰借前箸開天聰詔書哀痛言語切為民一洗橫尸血
摧鋒陷堅賞萬戶塹山堙谷窮三穴南平舊時頗臣順
欲獻封疆請旄節廟謀猶計病中原豈知一朝更屠滅
天道從來不爭勝功臣好為可喜說交州鷄肋安足貪
漢開九郡勞臣監呂喜不肯佩銀印徵側持戈敵百男

君不見往年瀕海未郡縣趙佗閉關罷朝獻老翁竊帝
卿自娛白頭抱孫思事漢孝文親遣勞苦書稽首請去
黃屋車得一忘十終不忍太宗之仁千古無

以團茶洮州綠石研贈無咎文潛 黃庭堅

晁子智囊可以括四海張子筆端可以回萬牛自我得
二士意氣傾九州道山延閣委竹帛清都太微望冕旒
貝宮胎寒弄明月天網下罩一日收此地要須無不有
紫皇放問富春秋晁無咎贈君越侯所貢蒼玉璧可烹

玉塵試春色澆君胸中過秦論斟酌古今來活國張文
潛贈君洮州綠石含風漪能淬筆鋒利如錐請書元祐
開皇極第八思齊訪落詩

贈送張叔和

黃庭堅

張侯溫如鄒子律能令隱谷黍生春有齊先君之孝女
十年擇對無可人箕箒掃公堂上塵家風孝友故相親
廟中時薦南澗蘋兒女衣袴得補紉兩家俱為白頭計
察公與人意甚真吏能束縛老姦手要使鰥寡無顰呻

但回此光還照已平生倦學昔日新我提養生之四印
君家所有更贈君百戰百勝不如一忍萬言萬當不如
一默無可簡擇眼界平不藏秋毫心地直我肱三折得
此醫自覺兩踵生光輝團蒲日靜鳥吟時鑪薰一炷試
觀之

平南謠

楊蟠

海南山似刀溪惡如發弩溪山毒煙中人骨水有蛟唇
陸豺虎蠻人徭賊行苦飛縱火劫民殺官府溪中之水

漲赤血山頭積屍變成土經年鬪戰兵已窮磔將屠城
不可數官家發軍救死國萬里歡喜得時雨誅擒凶黨
功德高海水一清奏歌舞山非無險水非無阻有地不
城城亦不武將民赤肉致戈戟口不能言心自苦

打麥

張舜民

打麥打麥彭彭魄魄聲在山南應山北五月太陽出東
北才離海嶠麥尚青轉到天心麥已熟鶻旦催人夜不
眠竹鷄呼雨雲如墨大婦腰鎌出小婦具筐逐上壠先

將青下壠已成束田家以苦乃為樂敢憚頭枯面焦黑
貴人薦廟已嘗新酒醴雍容會所親曲終厭飫勞僮僕
豈信田家未入唇盡將精好輸公賦次把斗升求市人
麥秋正急又秧禾豐歲自少凶歲多田家辛苦可奈何
將此打麥詞兼作挿禾歌

勿去草

楊傑

勿去草草無惡若比世俗俗浮薄君不見長安公卿家
公卿盛時客如麻公卿去後門無車唯有芳草年年加

又不見千里萬里江湖濱觸目淒淒無故人唯有芳草
隨車輪一日還舊居門前草先除草於主人實無負主
人於草宜何如勿去草草無惡若比世俗俗浮薄

妾薄命

陳師道

王家十二樓一身當千古來妾薄命事主不盡年起
舞為主壽相送南陽阡忍看主衣裳為人作春妍有聲
當徹天有淚當徹泉死者恐無知妾身長自憐

古墨行

陳師道

晁無斁有李墨半丸云裕陵故物也往於秦少游家見
李墨不為文理質如金石亦裕陵所賜王平甫所藏者
潘谷見之再拜云真廷珪所作也世惟王四學士有之
與此為二矣嗟乎世不乏奇乏識者耳敬為長句率無
斁同作

秦郎百好俱第一墨丸如漆姿如石巧作松身與鏡面
借美於外非良質潘翁拜跪摩老眼一生再見三歎息
了知至鑒無遁形王家舊物秦家得君今所有亦其亞

伯仲小低猶子姪黃金白璧孰不有古錦句囊聊可敵
睿思殿裏春夜半燈火闌殘歌舞散自書細字答邊臣
萬里風塵入長算初聞橋山送弓劍寧知玉盃人間見
夜光炎炎衝斗牛會有太史占星變人生尤物不必有
時一過自驚老醜念子何忍遽磨研少待須臾圖不朽
明窓淨几風日暖有愁萬斛才八斗徑須脫帽管城公
小試玉堂揮翰手

宋文鑑卷十三